

續金華叢書



繼

齋

士

集

圳

曠
山
豪

表
勵
準



甲春康宗校
子永胡懋

繼志齋集卷上

續金華叢書

明王紳著

曲

擬大明鏡歌鼓吹曲十二首 并序

臣幸生明時獲際雍熙之治世職儒業而臣又叨竊祿位媿無以黼黻皇猷伏觀太祖皇帝手提三尺取胡元平僭亂以肇造區夏所以雪近代之恥功誠不在湯武下可無所述以見咏歌被音樂乎爰取漢魏以來所載鏡歌鼓吹詞倣其體爲十二篇用紀豐功偉烈日大明鏡歌鼓吹曲以上雖其言蕪陋不足鋪張萬一或者命將出師時用之軍旅行陣間亦可以知祖宗締造之艱難與佐命元勛之勞烈臣不勝惶媿之至

元季亂極四海兵興太祖皇起淮泗平僭亂正大統爲神龍躍
第一

神龍躍奮滄溟耀光彩揚威靈沛厥澤甦羣生德所被枯者榮著仁
譽藹義聲壹戎衣天下平混華夷俱來庭歲僅周武功成考厥績如
日升萬斯年昭大明

右神龍躍二十句 句三字

蠻子海牙以舟師扼采石王師與戰克之爲殪奔鯨第二
鯨之奔勢甚張率醜類橫大江礪厥刃比厥航聯伍爲什黠且狂皇
旅奮義旗揚兵所指冰沃湯衝口口扼其吭有勿若者嬰以銳鯨旣
殪授我疆天兵赫赫從此光

右殪奔鯨二十句 十七句三字 三句四字

元將據建業天兵擊之爲開洪基第三

江之表惟建康負天塹勢莫強彼昏不知肆壽張恃其險干天常皇
震怒整戎行義旗指虜馘亡授我首啓我疆大業已建洪祚昌

右開洪基十六句 十四句三字 二句四字

陳友諒據豫章太祖親征之大戰鄱陽湖友諒死降其眾爲平

江漢第四

江漢湯湯厥淮豫章醜虜憑之以恣寇疆屢涉我疆以跳以跟天眷
有明命我哲皇爰整其旅以扼其吭戈矛泱泱旂旄煌煌部伍行行
解艘將將鏖戰大呼雷轟電揚虜酋旣斃虜眾亦降凱歌以還形於
樂章於赫武功上媿商湯

右平江漢二十二句 句四字

張士誠據全吳命師縛之爲縛狡兔第五

趨趨狡兔固其窟穴踰伏草萊肆厥慧黠跳跟三吳馳突雨浙皇命
征之授以節鉞桓桓虎臣鷹揚犬桀兵不流行刃不載血力屈智窮
自貽杙程銜璧而歸係以縲繼民瘼旣平天討斯揭偉哉豐功允矣
超絕

右縛狡兔二十句 句四字

元順帝能知天命舉族北歸燕京悉平爲平胡邦第六

胡運旣去如秋之索德政不修疆宇日削爰肇我邦于彼朔漠義旗

所指摧山震嶽君臣稽顙若崩厥角舉族遠遁不待誅縛既屋其社
寰宇清廓伊誰之力惟皇先覺

右平胡邦十六句

句四字

方谷珍自元末跋扈東海命將征之舉族來歸爲海波平第七
元政旣不綱萬國兵搶攘梟雄利草昧突起溟海傍名號僭相加狼
貪狼如羊大舶連百艘雲濤相擊撞蕞爾鯨鱸窟自擬蛟龍藏天兵
渡東浙疾若列缺光投戈載妻子逃匿海中央尋復係厥頸來詣轅
門降震雷旣戢聲朝噉出扶桑帖爾波不興浩劫塵不揚殘民沐文
化宛若鄒魯邦

右海波平二十二句

句五字

陳友定據全閩出師執之爲拓閩境第八

眞主起淮泗沛澤加無垠陳氏逞顛獠烽火連七閩自恃阻且遠偃
蹇不我臣天兵忽爾加奮擊速且神執訊仍獲醜困彼涸轍鱗凱旋
獻俘馘磔製徇頑噐海埂遂清靜千里無纖塵郡民樂蕃息煦煦涵

陽春

右拓閩境十六句 句五字

張師道李思齊據關中天兵平之皆入職方為定關陝第九

元德昏政焚芴氓戚懼籲於旻情上格命明君二豎無職方狴狴梗
我化據中原王師下加猶不循雄兵烈烈車墩墩鐵山且碎虜曷存
禡爾魄奪爾魂殲厥渠魁弔厥民關陝蕩無妖氛

右定關陝二十二句 十六句句三字 六句句四字

元社既屋苗裔猶存大兵再加窮極北漠而胡遂平為蕩胡穴

第十

元氏有天下腥羶遍中原辨髮裂冠冕士效呻憂言聖人受天命遠
續皇王傳手提三尺劍起自淮泗埭削平諸僭亂胡遂竄燕然屏迹
雖甚邈天討不可延窮追及沙漠巢穴無復全卓哉創業勳上雪唐
宋冤

右蕩胡穴十六句 句五字

明玉珍據全蜀僭大號師出討之舉國來降爲闡川蜀第十一
夏明氏據全蜀僭大號保西隩恃其險遠弗臣伏我師征之兼水陸
搯厥吻搗厥腹以杖擊地駭神速焚爾櫬受爾玉待爾不死恩尤篤
陶至和被清穆五十四州歸化育

右闡川蜀二十句 十五句句三字
五句句四字

元屬梁王保雲南招諭不降師出征之梁王死六詔平爲斲苞
枿第十二

巨木旣蠹根本繇傾爰有粵枿猶假息以生皇日肆哉毋讟我兵俾
其自歸庶不戕我氓屢遣使命諭以至誠蠢茲弗靈恣其頑冥皇赫
斯怒爰整旅以行熊羆百萬如雷如霆摧朽拉枯烈烈轟轟虜酋旣
殲棘悉平遐邇歸化四海由以寧

右斲苞枿二十二句 十八句句四字
四句句五字

賦

愛萱堂賦 有序

長洲邑庠文學掾湘廣柳均仲爵名其奉母之堂曰愛萱遠
徵言於予予美其篤於孝也因爲本其志面爲賦云

翳夫眾芳之紛糝兮皆賦形於玄造雖洪纖之不齊兮諒適人之嗜
好修篁之高潔兮眾目之爲君子蘭蕙之芬芳兮亦媚夫幽土羨歲
藜之萱草兮獨可以忘憂爰樹之於北堂兮藉以資母氏之優游念
吾母之婉順兮抱孤貞而溫良歛英華以抑闕兮存清潔而自芳聊
以之比德兮幸慈懷之是喜服先哲之格言兮敢同恭於桑梓慨日
月之迅邁兮何寒暑之交征懼榮枯之有數兮曷以致夫椿齡朝提
甕以灌溉兮夕攜鋤以培植幸根本之繁茂兮期光華之蕤蕤評曰
物各有用所適不侔兮娟娟萱草可以忘憂兮春陽時雨遂其生成
兮南山松柏願與齊榮兮

雪崖賦

繼志生生長於青巖青巖之山草木蓊密清潤襲人冬夏不易觸目
凝眸莫非翠碧求夫異見則莫能得也一日客有過廬而言曰吾聞

西蜀之中山曰峨岷積雪千古皎潔嶙峋炎威如燒皓質不磷瓊岫
瑤島高出西垠曷往觀之亦足以蕩靈襟而濯垢氛也子謝弗能得
王申之春予以蜀國之召特有萬里之行於是發雙溪泛錢塘過采
石越瀟湘蹈巫峽溯瞿唐憇錦城之泮水觀至國之清光顧瞻所謂
雪山者雖邈在數百里之外固常呈形於几席之上孰云遠得其髣
髴亦時時銜色於目睫之旁也予見而悅之卽欲抵其麓躋其巔挹
寒輝而滌熇悶引眞白而返吾之天也今來幾月矣有志莫遂惟是
中秋之夕月朗星晰精神澹然恬一無二童子在隅枕肱假寐兩睫
未交有一丈人越自西至華顛皓鬢冰肌玉膩披鶴氅之翩躚表素
衣之明麗禹步徐行植杖於地揖余而言曰聞子久處乎青而慕乎
白吾將與子論至白之物乎夫天下之至白者雪也夫雪潔其質而
素其姿降自天而不汚於泥遠炎熱而不常有縱加涅而不爲之繼
其普遍也見同仁之德其凜烈也示不可犯之威是故天地以之而
呈瑞豐歉以之爲著龜雖然此特泛言其常耳若夫居於崖者又有

異焉夫崖峭峻矗拔挺出天末杳冥穹窿殆與人絕爽氣蕭森天風發越倏焉變態嚴凝肅殺故雪之居其閒者質固魄凝歲積月增聚千古之素體成一色之皓形當六月面不爲之動真西土而安其寧比向之所言候時而降口時而融者不其異體而同名也歟於是言畢復擊節歌曰雪兮雪兮質何潔兮崖兮崖兮民具瞻兮雪因崖而久崖因雪而著二者固皆天地造化之功吾以其久而不渝此所以取譽也歌畢有風冷然來自中天予方倚歌而和促席而前回首視之丈人不知其所焉越數日成都楊先生某持卷以請文子啓而視之則雪崖號也予曰嗚呼疇昔之夜扣門而告我者非先生也耶先生笑而不答予亦默解其情因書之於卷以與先生定夫清白之盟

詩

明農美蜀大夫安老陳公而作也公以高年休致而歸邦人榮之故本其志作此詩以美焉

赫赫皇明受命于天克綏厥猷皇道平平爰稽于古乃建維藩碩碩

蜀都奠于三川

惟此蜀都於昭有光文教誕敷物阜民康舉手加額以祝我王王不自居曰予臣之良

其臣伊誰聿有壽考爲國元僚是日安老惟安老公王躬是保匪義不陳匪德不導

王曰予學汝其輔之王曰予政汝其助之公拜稽首對揚王休人亦有言無德不酬

治化攸敷厥既有徵寵利弗居天道惡盈懇懇有詞請命大廷天子日俞嘉爾老成

式休爾政仍優爾祿匪日爾私敷錫汝福大哉綸言降於九重王曰上命予敢弗從

乃錫安車以奉其行乃錫華宴以娛其情扶老歡迎出入其承爲國之楨爲士之榮

公曰是恩千載奇逢受寵若驚心益忡忡伊昔有聖志在明農予豈

若儔適諧其衷

岷山峨峨江水沈沈公有嘉猷簡在王心公有善政播在德音我懷
若人無古無今

右明農九章章八句

五言古今體詩

上巳日迎駕宿新寶光寺

東風扇微和旭日絢陽春晨興秣我馬駕言出城闈矯首京華道遙
遙望清塵先驅曾未至眄睐徒勞神解鞍憩古刹息慮澄吾真野人
好辭色日夕羅盤飡佳節獲良會慨羨誠難頻行當盡一醉鼓腹歌
君恩

謁余忠宣公廟

昔在元祚去四海遭亂離羣雄互驅逐戎馬縱橫馳降城敗國者比
比忘忸怩坐令疆宇蹙百二山河隳桓桓忠宣公耿耿匡濟資早負
經綸具晚鎮舒江湄七年握兵符哀集多義師控禦旣云備撫輯亦

已綏奈何荆棘間妖氛障陰霾豺狼連八萬震吼奔鯨鯢眾寡既莫敵孤城竟難支鞠躬誓蒼旻臣分死所宜但恨敵未殲生民墊塗泥闔門蹈湯火子女尸纍纍公死曾未久國事日以非大明啓泰運海宇臻雍熙旌書下九重褒寵不少遲忠精貫日月姓字編簡垂人生孰不死公死耿餘輝舟來自西蜀拜趨謁新祠徘徊訪遺胤髣髴瞻容儀庭下草委靡庭前水漣漪想像隔千古忍讀墮淚碑醉以椒桂漿悼以忠節詩願起巡與遠與公相追隨

簡義門鄭叔度兄弟一首

雲收山色清雨止溪聲作散步出長廊晚霞川上落默參玄化機至理匪微邈併我鬱鬱情聊向知心樂自余事遙邁湖海倦飄泊歸來尋故交存亡半冥漠遐思邃古初千載只猶昨何必介余懷俯仰期無忤

湛碧軒爲彥璣公子賦

方池僅半畝瑩澈含清冷中涵太古色凝然寂且澄天光任徘徊雲

影由虛明既得本然體鑑物無遁形美人構幽軒臨之有餘情匪日
事游觀天君藉虛靈俯仰參化原聊復得此情

靜復軒爲吳尙綱掌書賦

一氣互膠轉化輪無停機靜極固復動動爲靜之基芸芸彼眾植春
夏發華滋玄冥一司令明命皆攸歸伊誰領斯趣探蹟窮幽微高人
悟玄妙澹然本無爲世紛不外膠寂寞靈臺熙雲歸碧落空木脫林
露姿達觀了無言默坐神自怡

同無爲真人游靖通庵

鶴鳴谷酬響雲去松露頂孤窩閱煙蘿萬竹琅玕挺翛然出塵趣悠
悠詎能領俯仰了無言澹若淵中靚

前哲慨已往後賢業方巍匪慕登眺嘉庶以同襟期好鳥流佳音脩
篁薦清颺於焉契遐想千載高風徽

師古齋爲章方大賦

鴻荒昧兆朕混沌光氣全三皇肇至化人文始開宣後來聖賢作一

一皆精專伊誰肆厥學捨古無攸傳欽哉典謨訓千載星日懸蚩蚩
眾年少胡爲竟雕鏤趨華逐顛末浮風竟茫然卓彼雙致英立志何
翩翩神遊邃古初學究周秦前抱編閱蟲鳥拂簡臨雲煙理得趣自
真託此陶其天

留別叔盛從子

人生困形役擾擾大化中悲喜見別離榮辱隨窮通我爲名所累縱
浪如飛蓬萬里隔吳蜀三年走西東故山渺何處迴若孤征鴻遠還
見骨肉握手歡笑同胡爲遽云別我心豈不恫奈此簡書逼去住心
忡忡江花擁層浪柳絮舞和風觀物易感傷未別思重逢執手雙溪
上相看澹無容願言善自愛冀爾振吾宗

題杏林圖

東風扇微和萬木敷芳芬嘉林有名果不與凡植羣伊花炫明麗厥
核存至仁惟昔有仙子志在甦罷民年深功已著植之滿比鄰至今
十載下藹藹垂令聞卓哉壽易彥文質何彬彬種德如種杏擇術非

爲貧存心惟愛物託此康斯人不聞聖有訓作善福可臻願言勉自
強往軌良可遵

簡鄭叔貞四十二韻

結交匪無人知己貴有適十年走東西浩懷久無得中歲友鄭子誠
哉我三益文采綉鸞鳳才華炫金璧譬若雲臺將折衝懾強敵叱咤
驚鬼神人馬皆辟易又若鄧林材挺出樗與櫟蔚爲棟梁望庸豎所
共識器大不小成材良遠繩墨物理古則然子實甘蓬華迢遞天台
山回首關河隔旅食困鹽齏久作山南客爲言從師游擔簦來卒業
阿師正學公長才駕濂洛兒童推世賢朝野稱文伯蹇予在弱冠共
寓蘿山宅雖號同門生實藉師資德扣道辱茲應問疑承縷析乍別
書累篇同處日共食契誼等弟昆交情固膠漆一自事分離十載闕
良覲重逢錦水濱握手道夙昔雲萍總知心顧我眼獨碧唯子蚤及
門器業尤英特鑽瞻久已悟升堂仍入室董薛未足倫游夏庶其匹
賢王雅樂道醴筵日宏設羨子富文辭諏諮動移刻屢續梁園賦每

前賈生席緇衣弊復爲白駒去還絜恩禮實已隆負荷成感激念我
自遠歸神瘦肢體瘠慰藉盡衷曲周旋竟晨夕維時秋正高商飈怯
絺綌離菊吐芳華鮮鮮鬪黃白呼兒具雞黍郵筒箋釀秫情真味自
長道合趣何極盍簪人所樂况爾同師澤萬里獲良晤忻忭宜無斲
聖轍豈難追行之在不息但願長相親永言共鞭辟

思親堂

烏鳥啼北林白雲度東嶺慷慨游子懷感物清夜永雙親七十餘黃
髮颯盈頂一從走東西三年睽定省纖纖寸草心遙遙萬里迥宦游
豈不嘉衷情安可屏陟屺復陟岵足且延頸眄矚目生花淚下急
如綆高堂扁思親著此情耿耿何時奉周旋允言遂深幸

病中述懷四首

人身配兩儀至和乃無愆運行一差忒百疾從茲纏智人善保養調
攝歸本然日子昧斯理情慾不自宣內感仍外傷水火相凝煎形神
幾已離榮衛失其源匪藉湯劑勳胡能苟偷安誓將更生日保身如

臨洲上以奉遺體下以全天年負荷已逾月今晨覺少康稍興臨古
鏡頽顏忽半蒼灼彼東籬菊依依傲寒霜雖然質柔弱晚節猶含芳
此身胡不如撫己成慨慷人生匪金石盛衰固其常但得保其眞榮
悴非所傷

爐煙颺微熏簷花散餘馥身閑心自清病可神始足矯首對金門怡
情陶玉燭西風從何來遠遞庭葉至飄飄颯有聲來向書牕墜景物
易轉遷時序忽已異羈客念故鄉中夜不成寐仰聽河漢明俯聞鴻
雁唳翩然逸興舉恨無凌風翅

去古日已遠淳風日以漓人情善誕幻去就浮雲馳彼哉儉儉子出
沒神鬼奇炎涼隨勢附朱粉從心施一朝冥機至反成拙與癡於皇
賦明命願諛常在斯不聞聖有訓居易以俟之懇懃謝天君爲我慎
操持

徜徉衡門裏積疾頗以安藥石有時親塵俗不我干雖忻神慮得且
畏時序遷扶憊挾黃卷幸見孔與顏沈吟北牕下高睨太古前曠懷

隘宇宙浩氣凌雲煙何以解蘊抱奈此酒量慳持觴縱不飲對之亦
陶然

南行道中述懷二首

歲晏霜雪零驅車卽長路雲山杳茫茫舉趾將焉赴迢迢滇南道惻
惻終身慕志在忘險夷情深略憂懼風號林聲淒日落嵐光暮哀猿
抱子啼慈烏返初哺物理古則然我生亦何故撫景增愴悽仰天淚
如注

滇雲接馬首夔道盤羊腸感慨情思惡登頓肢體傷平生終天恨今
日許予償但得情事申豈憚關山長豺獾知報本春秋事烝嘗惟人
有天性肯愧虎與狼哀哀王哀氏久廢蓼莪章我生千載下衷情允
相望

題坦然齋

去古日以遠機巧日以生紛紛任鉤距無復存至誠孰知玄妙理所
貴在坦平美人領斯趣百慮帖然凝閉門謝往來絕口輕縱橫但忻

情意得不識辱與榮浮雲去復還飄飄傍幽局好月不待招清夜當
戶明幸有一尊酒聊以娛吾情悠悠身外事居易復何營

題山水圖

澄江波鄰鄰柳枝裊裊結廬在繁陰隨時事漁釣紫芝無續歌陽
春有餘調縱浪烟波中清風滿孤棹

題翠微深處爲傑斗南上人作

心閉境自清境清神愈適是以曠達姿遐蹤寄幽僻方外有名區峰
巒翠如積其中窅且冥遼遼塵俗隔高人海上來閭浮遍遊歷蚤歲
悟三空冥棲縛禪寂杖藜入空青斗室生虛白人我久已忘門羅點
頭石雨過寒襲人雲收山在席孰謂西土遙於焉真淨域

題於仲寬畊樂軒

道在情可娛業安心足適自昔超邁姿棲棲依稼穡伊人負幽趣蚤
歲任民職一朝解組綬萬里來蠻貊世慮幸已忘躬畊期戮力謀生
効子真遺安慕龐德寵辱了不知寒暑任更易但願歲功熙永言遂

怡澤

黑松林

曲靖有松林逶迤百餘里蒼蒼無異色鬱鬱有佳致靈籟天上來怒
濤樾間起赫日任行空淒颯常襲體慨彼貞素姿一一皆有以大足
任棟梁小可就規矩無能致通都寂寞徒自棄丘壑多遺材達路少
廢枳斯理諒匪他天道固應是

題東川上人小畫

青山橫白雲紛紛積蒼翠矮屋兩三間隱約空濛際是境有耶無此
心亦何慮上人悟真空了徹西來意假圖託是觀於焉本無二

遊普安水洞一首

何人鑿混沌施此神妙功萬山儼羅列奔濤穴其中沿流極深邃縱
步迷西東林嵐藹蕭瑟石牖開玲瓏高喧隔咫尺塵凡幻鴻濛嶮巖
自生成豁達天宇同欲探流盡處杳默難遂窮鴛言騁幽賞滌此塵
垢胸盪漱石髓嘯傲來陰風遲回竟忘返恍入蓬萊宮誰能謝喧

囂於焉寄遐蹤

滇陽寓舍述懷二首

朝觀金馬雲暮見碧雞月雲去能復來月虧光暫缺人身胡不如死
生成永訣哀哉我嚴親白日貫忠烈赫赫蘇武心耿耿真卿節名雖
萬古懸子情何時輟撫景重感傷五內幾分裂孰存董狐志直筆昭
子奪願言上遺事允俾先志雪

時違力弗逮事乖心靡寧萬里抱志來一念潛杳冥乾坤誠罔極蓼
莪若爲情俯仰竟無言捫臆徒吞聲忻忻羣草木藉此雨露榮熙熙
獸與禽逐時自生成慨彼重予感中夜百憂并誰謂華嶽高無階我
將登孰云溟瀚深無桴我欲憑抱此終天恨焉用存吾生

滇陽因詣太華禪寺寺乃先公嘗遊之地且有遺文在故作以

志子哀

結習塵漏弘幻綠莫能具大哉有深息欲酬渺無路萬里抱志來棲
棲了弗遇佛法夙所歆玄機曾未悟今辰謁上方欲俾心臆露稽首

大覺尊慈悲幸垂度茲山實名勝況是神遊處瞻仰手澤存惻惻增
予慕山嵐結愁容林飈發悲趣徘徊復徘徊月色滿祇樹

簡劉有年

身輕心自寧道在義斯得窮達匪可謀所貴守明德漆園非要任委
吏豈清職但能慎其天高風示無斲若人有嘉趣資稟甚英特曠懷
在千載傲睨凌太極十年走江湖遐蹤寄滇嶼蕭條經濟具寂寞賢
良策落落晨星踈蒼蒼松柏碧勿歎知者稀聖轍期戮力

曲靖道中清明

羈旅易感傷遇節惕若驚况茲清明日疋馬蠻貊行東吳隔萬里無
從謁先塋南滇在咫尺末由覩玄扃所懷何日究慨念百慮生徘徊
蹊路側眄睞涕泗零乾坤誠罔極時序乃有更吞聲捫胸臆草木爲
回情

和晏文炳先生雜詩五首

卜居

夫君家甬東中歲事播遷十年走川蜀浮蹤等雲煙歸來卜新居乃
在浣溪邊軒窗納西爽桑麻蔭東阡有兒能種秫有婦能具筵油油
大化內持觴日陶然邈哉杜陵翁高風著遺篇此室幸密邇心期無
後先

讀書

閒居幸無事蕭然離世紛仰探玄化機俯索羣典墳羲皇去已遠太
樸日已分後來七八聖遂爾褰人文斯道賴不泯赫赫明朝敞挾册
事討論喜得玄趣真神交千古上尙友千古人薰風滿坐生此樂難
具陳

種秫

石田十餘畝戮力勤敷蓄及茲東作興耕耨弗敢遲種秫不種秔每
爲人所嗤豈知中歲後形神日已衰匪藉此濁醪年華益摧頽人力
既已至好雨來及時晨興理蕪穢豐稔當可期新我頭上巾濯我掌
中杯縱浪百年內謀生良在茲

懷友

索居亦已久無從覓其羣平生素心交聚散知幾人死生成戲劇會
晤安可頻浩懷既莫遂激烈徒傷神遙遙睇關河藹藹瞻停雲幸有
杯中物日夕可相親

采菊

東籬有嘉菊燦燦黃金明爲此秋節至歲蕤發華榮白衣從何來遺
以酒滿餅呼童亟命酒自起掇其英采采不盈掬匪欲延遐齡物情
自可悅庶以娛吾生

答馬伯章先生

倦遊滇楚間鬱鬱抱志歸感愴既已極形神亦何疲曠懷素心人夙
昔同襟期高風示沖漠遐蹤寄冥棲石林美風月洒洒入我思何時
重過從忽略畛與畦可思不可到爲公致言辭放浪形骸外且復啜
其醜但得方寸安勞勞竟何爲

潼川州十景五仙詩奉教作

十景

牛頭曉日

旭日吐微暎寒芒射空際鬱鬱牛頭山尙冒溟濛氣始瞻彼清輝稍
覺斂羣翳草木回容顏林巒藹蒼翠須臾金輪升赫赫明且熾餘耀
及容光幽顯無不至願此靈臺照於焉竟何異

洞門樓閣

支龍來蜿蜒靈秀鍾磅礴誰其施神巧鑄刻成樓閣石牖開玲瓏巖
肩隱冥漠列嶂儼森羅奇葩鬱紛錯飄飄學仙子棲冥寄丘壑其間
窄且幽豈無託寥廓幾欲相追尋又恐其蹤邈

龍頂先春

洪造本無私大鈞同一圃如何龍頂山節氣分先後崇岡鸞鳳翔複
嶺龍蛇走和淑之所鍾春陽每超踈踈隴梅新纖纖澗草秀化功
妙且神此理詎難究至和氣自殷何必拘常候

東樓晚照

潼川之東山上有古書樓相傳唐趙蕤於中註春秋伊人久已化其
迹尙可求落日下平陸登眺光未收餘輝射崇臺殘影下簷頭徙倚
對西山爽氣顯若浮撫今重懷古行歌且歸休

張把舞草

化工賦羣品動植各有彝苟爲失其性猜詭人共疑古潼有異草枝
葉何歲蕤綽約解人意婉媚存妓姿無風自傾舞俯仰如有知惜哉
長路傍甘爲牧豎欺我欲植其根怪物世所豈

北巖琴泉

北巖有寒泉其音寂且清譬彼焦尾琴空中調徽聲入耳自歷歷臨
風常泠泠可以解愠抱可以娛心情蕭然疏以越絕響聞青冥寥寥
太古意誰復於斯徵幾欲策藜杖臨之濯塵纓

涪江夜調

涪江勢若奔晝夜歸朝宗嶙峋灘上石屹立當其衝激之成天籟清
響振秋空午夜月華明鸞鳳遙相逢氤氳下和鳴徽音中商宮伯牙

有餘思子期渺遺蹤疇能領其趣此調高無窮

南山暮雨

薄暮嵐光浮林巒倏蒙翳日晷未下山雨脚已垂地沈沈猿鶴吟勃
勃蛟龍氣雷轟巖石裂瀑瀉銀河注四顧毛髮張惕惕增予畏須臾
天威收風月浩無際萬象儼森羅太空本何意

鶴林春色

鶴林美風景凜凜歲寒色况茲陽和交蒼翠鬱如積鮮鮮素羽禽皜
皜雪霜翼逐時自生成熙熙性舒適勝地布黃金奇葩攢白壁僧舍
鎖煙霞梵宮炫黃碧回顧花柳區徒能爲形役

兜率煙霞

潼川古招提久矣擅名勝煙霞翠作堆直據煙霞頂蒼蒼異人世漠
漠通僊境下視閭浮間可與蔚藍並老僧不出戶蒲團坐幽靜溟滓
天地閑蒼茫歲月永禪悅不知時賴有晨鐘省

五仙

趙蕤

高人抱冲志不與凡士同譬之凌霄鶴雞鶩安能從邈哉趙大賓錦
繡盤心胸百家盡研究探索歸會通業成事肥遯不肯干王公竟作
赤松遊千載存徽風

文塚

卓哉劉拾遺上書諫其君逆鱗固難批忠憤須具聞書成君不聽從
此終沈淪至今潼川境有塚瘞其文寒煙被宿草西風送浮雲吁嗟
身後名過者爲酸辛

保和

后有易玄子吏隱已多年由來積陰德竟爾成神仙蕭蕭碧梧樹憑
之以高鶩雙鳧渺渺何往千載猶相傳疊疊山水在駸駸歲月遷遐蹤
諒難追有無茫昧然

魯交

飄飄蓬瀛姿磊磊經綸具燈窗効勤劬玉階展衷悃落口唾成珠每

動人主顧藉清夜吟落落稱奇句終焉脫樊鞅遠蛻人間去至今
山水間林風發清趣

董仲

東川有奇士冥栖寄巖壑讀書養靈根深悟羲皇學珪組不能羈榮
名非所樂終歲味道腴志慮存淡薄九還丹已就金鼎光爍爍乘化
上青冥遐蹤付寥邈

陪滕至剛史行可王孟炳林嘉猷小酌有作

靈雨集芳甸商飈怯絺裳新涼戰殘暑煩囂滌中腸故人萬里來相
會在一堂謂云同浙左及此會殊方邂逅適所願歡樂亦未央庖丁
具蔬果列坐開壺觴情真不覺醉談諧益相忘噉噉雲中翼泛泛川
上航人生豈不如聚散成慨慷

九日禮賢館小酌分韻得影字

衡紀倏云邁駒隙快先騁清露滋芳華粲粲金出礦故人聚殊方清
酌酬嘉景白衣何必來黃封賜初領謂言共恩榮不覺成酩酊情深

談益諧誼洽坐尤永况茲一會難各爾萬里迴商飈散金聲錦江漾
秋影嗒然傳忘言淡若淵中靚

宿蓮池鋪柬嘉猷

宿雲被原隰落照微漏明馬倦僕亦痛迫暮投荒亭呼童具晚食纍
石支鷲錦燃竹見火色欹枕聞灘聲誼洽話正投味薄神自清明日
眉山道不待雞再鳴酬此景慕心亦以奉恩榮

謁岑彭

桓桓漢虎臣勇氣蓋三軍提兵如剖竹指日俘公孫狐兔穴將覆勢
窮能噬人七首一毒身激烈肝膽陳部分旣已定將星隕轅門尙幸
天啟劉成算如有神道經彭山下解鞍慰忠魂驚颺號古木孤祠翳
浮雲想像起深慕彷彿英氣存

謁三蘇祠二首

少聞三蘇名長讀三蘇文竭來入西蜀景仰心彌勤新冬天始肅長
空歛氤氳聯騎行遠道趨謁及茲辰奠以椒桂漿薦以溪澗芹禮微

志則專道顯譽斯存俯見瑞蓮花仰睇眉山雲徘徊舊坻上西風動
綸巾

巍巍峩眉山形勢屹然峙蜿蜒百里間清淑鍾蘇氏頗聞異人生草
木皆枯死一賢曠百世況此三父子既專造化妙且奪山川美組織
敷人文經綸垂世軌喬木撼高風新祠復遺趾時遠人則亡英靈庶
斯止

瑞蓮詩

草木本微物化工偶神機禎祥有所附往往超等夷孟冬霜露繁百
卉競凋衰胡爲蘇池蓮華色猶葳蕤父老相謂言不見已多時去年
當十月凌寒恣芳菲得非文明盛於此兆見之竊意蘇子生山川淡
無輝清淑鍾其門動植安所資去此三百年氣運今已回行當生異
人此蓮應再萎

題思詒齋

温温徑尺璧寶之無不至盈盈一杯水捧之惟恐墜人生七尺軀負

抱良已貴欲思淑厥身當須奉名義五陵豪少年昂昂多意氣不圖
顯揚謀聲譽只如寄栖栖陋巷人簞瓢或弗繼動履不忘新令名日
昭喇置器且求安保身豈無計載歌思詒詩令人發長喟

灌陽懷古

灌陽翳頽城清湍夾荒廛居民數十家煙火何蕭然停驂問民俗共
言苦輸邊篋扑無完膚逋租動累千憶昔吾遠祖所至人共憐曾來
守是邦煩苛隨時蠲既除威茂運且息官貸錢惠愛民不忘姓字人
能傳茲來訪遺迹荏苒三百年仰探撫字心皓雪凝山顛

奉陪安老致政先生游南莊作

溪迴村落虛山迴川原曠草堂工苟完嘉疇君所貺是時收穫初聯
騎遙相訪東郊騁遐觀西隣薦新釀酬酢衡門間徘徊土橋上風俗
粟里侔景物輞川抗行辭玉筍班來作山中相豈無戀闕心亦有明
農望進退荷恩榮睠焉期夙尙

喜聞胡伯尙至而作

十年金石交千里雲山隔秋空雁冥冥夜雨情脉脉平年蓬華資區
區二三策疇能了此心非子將誰白好音從何來云舉雙鳧翮眷言
遂情素豁若千金獲

和嘉猷林先生韻

沈唵北牕下不見知心人牆角有寒梅冰姿出塵氛對之有佳趣侑
以酒滿尊嘯傲萬物表皓月生嶙峋

我先客西川子來自東吳成此萬里會幸得一尺鱸苦乏尊中物旋
解腰間魚對面不爲樂別後徒緘書

除夜夢子巖外兄

人生海上萍離合無定期況此生死間一氣聚散之生也固無喜死
兮竟何悲悲喜欲不形未能絕吾私念子親骨肉臭味同蘭芝結交
三十年洞豁兩無疑豈爾託心曲允矣爲師資如何成永訣無復重
見時寒齋歲云暮耿耿入夢思雨夜覩顏色宛然致言辭落月照屋
梁浮雲散空虛理在意則那覺來百事非

贈鄒先生

步出東郭門遙遙逐車塵車塵眯面目頰襟隘氤氳好風從何來拂
我頭上巾浩懷欵開豁回首逢故人念子丹穴雞迴出雞鶩羣揭來
覽德輝翩翩下峨岷才華眾共羨道得心自存願言勇鞭辟相期繼
斯文

簡一宗異中二禪師

十年走紅塵擾擾徒勞形幾欲出樊籠淡泊寄遠情今日至上方偶
與玄覺并焚香讀雄文隱几聆妙經檐花遞餘馥庭草敷新榮俯仰
足心懷奚必談無生

夏日懷敬直先生

天氣屬清和幽齋淨於水端居仰聖明俯探玄化理浮雲馳遠郊重
陰蔭書几好鳥弄佳音閑花發奇卉蕭散有餘清煩襟蕩塵滓比鄰
有幽人相去不尺咫論心膠在漆談道官協徵信宿不相逢離憂騁
如駛大音本希聲高懷曠知已斯文幸可徵殷勤望之子

夏夜同劉仲美讀正學方先生文

良宵塵事寂好月升前楹庭卉薦芳細松風入懷清故人百里來一
見雙眼明呼童具雞黍濁醪聊對傾山南文章伯雄論神鬼驚一自
鈞天奏屏縮嘈嘶鳴挑燈謾披閱口誦兼手膳煩襟頓蠲滌鄙悵無
由生信知斯文妙能起薄俗情酒酣共忻賞疑義釋春冰

夜坐書懷簡仲美

弱齡志問學屏慮息眾營道遠力驚下潦倒終無成摛辭希往哲談
經對諸生谷空靈籟應候至悲蟲鳴感物成內省俯仰慚愧并故人
適遠至使我懷抱傾薰風起修竹微雨洒疎櫺悠然領斯趣新暑隨
時清步口頽簷下笑談到深更豈徒今夕樂庶得千古情

出郭言懷

經時不出郭出郭多佳趣按轡故徐行庶以滌吾慮農唱發前村人
家隱深樹溪流縈復折揭涉不辭屢忽驚白鷺起遠向青山去人生
貴佳適是非安足預即景動遐思故山渺何處

讀李御史文藁

枯蒼鬱嵯峩上與浮雲齊秀氣之所鍾每生超卓姿嫩人抱奇才造
就從碩師新詩追少陵雄文逐昌黎鳳鳥鳴高岡祥物由來稀幸茲
文明世拭目一見之渴吻沃瓊液虛腹餐藿芝豈惟過所望體腋生
光輝蜀道走驄馬夷民瞻繡衣邊情重當恤願言謹諏咨

灌陽道中

五載錦城居兩行灌陽道豈爲事盤游直欲窮探討地偏炎瘴息山
深秋氣早躡屩上峻嶒騁懷覽微眇心清對雪山意豁極雲島冥觀
宇宙間一一皆足了暮谷動西風夕林下歸鳥爲語山中人相期拾
瑤草

送菊與鄭叔貞因懷林嘉猷

舊歲東籬菊持贈逋仙嗣今年花復開特遺東里子二子本同門此
花亦同根將花託所思晚節於斯存

和鄒公瑾留別一首

有美蓬萊侶玉質何溫其瓊琚以爲佩雲霞以爲衣翩然駕白鶴悵
望將焉之岷山奇復高渝水清且漪相望不咫尺何由共襟期佳音
此金玉遺我可解頤

題終養堂

散步出平陸烏鳥啼北林矯首睇寥廓白雲飛遠岑感物易傷懷惕
惕孝子心嚴親不侍養歲月何駸駸幸有堂上母亦已桑榆侵奉觴
介眉壽春酒隨候斟亦有忘憂草樹之高堂陰謂山固非高謂海亦
何深但願遂終養仰止損與參

題去思序卷

民情本無事帖然靜於水順性以道之自能臻至理縱觀古循吏視
民如赤子旣去人見思芳名藹青史藉藉金郡侯存心多豈弟持節
鎮全閩剖符當帝里旣敷延壽化且洽信臣洽仁政方下孚宿瘼已
如洗胡爲北堂萱夜逐秋霜萎蓼莪遽興哀歸心疾於矢攀轅竟何
爲卧轍諒難止載歌甘棠詩庶以著侯美

寄昂伏菴禪師

弱齡厭喧囂雅志尙玄默胡爲中年來奔走倦形役一自服官箴出入不遑息雞鳴走風雨旅食困朝夕山中有高人端居縛禪寂寞觀萬物表幽情寓泉石道機旣云熟眞源諒應滌不爲塵鞅羈但恐坐詩癖話別華川湄寒暑忽屢易觀想三生緣寧念紅塵客

東郭草堂爲姑蘇王仲遠賦

草堂三兩間去郭十里餘門栽陶令柳架插鄴侯書漁樵足生計琴樽供晚娛未知杜陵宅風致更何如

寄幻泊上人

束髮弄文翰鞠明仍究曛泪此塵俗囂至道殊未聞凡緣如蝟毛擾擾集幻身疇能超物表悠然樂清眞夜對靈谷月曉踏長干雲所思在咫尺可望不可親孤懷日已委一見自足陳終當重相過共說無生因

題墨竹

娟娟盈尺素誰寫凌雲姿長梢拂霄漢羣鳳來參差坡僊久已往湖
州不復追高公有清致醉墨何淋漓

竹窻小隱爲羽士孔德容賦

嘉種分淇澳靈根毓清都子孫旣繁衍枝葉何紛敷羽人抱高志淡
泊宗玄虛開窗翠靄入展席晴雲舒晝閑寂無事寶篆銷金爐手持
長生訣心味靈筌書清風滿廣座明月來鳳雛何時解羈鞅一造雲
巢居

栢臺餘思爲陸廣平御史作

栢臺有君子衷懷孰能知朝伸澄清志夕起追慕思所思何以見感
此栢上烏烏雛未能飛烏母每哺之一朝雛遠舉返哺答母慈人生
亦奚爲成此長別離嚴親掩重泉欲見杳無期尙幸有阿祖遠在天
一涯得祿弗得養痛此烏不如聞之重予感泫然雙淚垂作詩寫子
悲於焉寄吾私

送呂貴行還會稽

平生栖遯志逍遙聊自足胡爲中年來馳驅逼原陸王事亦靡盬青
春去不復衰病忽已侵詣闕陳衷曲有詔許歸休翩然返初服三逕
迹未荒一身計堪卜田園成日涉桑麻長新綠藹藹遠塵紛忻忻遇
童僕春雨膏石田秋風被茅屋村塘足佳趣何須羨盤谷

贈紫陽周羽

我家在金華居近赤松側赤松有山人云是蓬壺客服食惟紫霞叱
咤起白石至今千載下在在存遺迹春暮桃源深天空海雲碧幾欲
扣其門奈此塵凡隔飄飄紫陽生靈臺湛虛寂彈指驚鬼神妙用靡
霹靂滄州與赤城乘鸞恣遊適真侶會因逢煩君致吾臆

茲蒙聖恩追錄先德當贈誥渙頌之日適余初度之辰悲喜交
中輒形咏嘆是用錄呈同志共作榮觀

弱齡志家學黽勉事討論顯揚恨無術惻惻長抱辛今歲倏四十劬
勞在茲辰寵光適下賁沛及沒與存易名錫美謚贈誥頌紫宸片言
重山嶽卓彼雲漢文悲喜集中懷慶慰來上賓匪徒事誇耀大節從

此伸鞠躬謝蒼旻何以酬明恩君親兩毋忘不負六尺身

題李氏歸盤卷

清江李氏子遐栖蹈高躅瀟散類朝川幽深若盤谷榮華絕外慕漁
樵聊自足終此繼家聲其樂矢弗告

送方玄璞還天台

商飈動秦淮木落天雨霜相見卽相別歸興何倉惶謂言有慈母星
星在高堂定省久已曠手把連環將晨興戒行李趣上江上航片帆
入煙霧指日過錢塘天子急求賢夢寐思才良宸衷期上格賫弼自
彼蒼旁求藉形像精藝終難藏行當應丹詔載筆趨明光

十一月二十夜夢子嚴外兄

己卯歲

自慚孤陋資落落素少偶緬懷骨肉親惟此知心友髫童藉師資相
期同白首論情漆在膠談道杵投日死生成契闊意氣竟誰負今夕
復何夕重把平生手悲喜形笑談涕泗被脣口始欣情思真稍悟永
訣久蕉鹿旣莫憑壑舟去難守招魂覓巫陽孤月在鍾阜

送袁景先歸老還鄉

十載服官箴萍蹤等浮雲勳名雖未就歲月不待人敷歷遍繁冗白
髮生苦辛上疏乞骸骨詔許歸故園鵬程邈難到鷗盟良可馴歸歟
尋舊隱超然離塵紛龍江歲華晏驛道梅花新湖山舊風月遲子來
相親

謁卞將軍墓

忠孝實大節世間全者稀桓桓卞將軍父子兼有之伊昔晉祚衰狂
獬縱橫馳秉國既非人清談了無施臺城一失守生民墜塗泥九廟
震戎馬坐觀綱常夷將軍舊忠勇悉力舉義旗揮戈指逆賊捐軀竟
難支彼惟眡與盱赴難甘於飴親既爲國死誓以身相隨哀哉賢父
子至行全民彝邇來千餘年荒墳屹纍纍我行訪遺事徘徊治亭西
英風撼宰木烈節昭穹碑九原不可作再拜雙淚滋世事幾更代令
名日月垂因之感予懷吾將以爲師

詠逸民六首

唐虞世已遠邈焉逮衰殷戡黎啟周業大統集厥勳壺漿來士女四海望陶甄如何首陽下獨有窮餓民采采山中薇大義將焉陳頽波不可挽卓行誰與倫隘雖聖不由求仁斯得仁

西郊獲奇獸魯史終筆削列國事紛爭士習縱橫學卓彼魯仲連冲懷隘寥廓緩頰秦師退立談聊城拔奇功不日收世議酬高爵孰知斯人志飄飄在丘壑翺翔東海上遺踪散冥漠千載仰高風於焉可敦薄

羸政逞凶毒椽喪綱與常志士共扼腕疾走奔四方赫赫隆準公基漢由三章奈何好慢士溺冠裂其裳商山四老翁髮皓雙眉龐非因國本重安能趨帝傍奇哉子房策旣以用其良一言回主意期期媿周昌

聖門三千徒一一皆佳士時君問其賢獨屬屢空子仰鑽及瞻忽駭駭殊未止惜哉天喪予一慟回也死游目秦漢間舉世難與比孰知千載下迺有牛醫嗣汪汪千頃陂渺漫無涯涘不見鄙吝生德馨照

青史

世上膠外紛得失互相戰富貴眾所欲孰肯居貧賤龐公沮溺徒卓
卓有高見深畊隱鹿門素無功名願安危本殊途妻子匪不戀刺史
弗深知致詞徒繼綫

高人有遠情塵俗莫能累形迹苟相忘飄飄自遺世吁嗟晉室衰士
習薄名義淵明千載賢獨爾抱深喟仰觀世運移俯嘆川流逝怡顏
藉庭柯折腰愧時吏茫茫大化中此身本如寄持此何所之酒中有
深味

長洲陸節婦詩

修短歸大化孰能究斯理嗟哉我良人盛年委流水鏡缺無復完璧
玼終致毀既乖偕老願詎忍不卽死素帷暗空閨青燈照孤寐欲鞠
膝下兒免作若敖鬼見身幸已成叨恩幸百里諒彼九京人瞑目黃
泉裏共姜秉高節柏舟以自矢陸母何獨賢千載蹈貞軌

題方日新壽萱堂

手種堂北萱欲娛堂上親親年日益高萱花日芳芬但願地長春花
容不枯稿對之忘百憂足慰親衰老培之以沃壤溉之以清泉愛萱
卽愛親花妍親自懽

俗悲日借太史侍郎練公韻述懷

憶昔髫鬢日志在讀父書性魯守頗約道得情自娛平生檇散質卅
載雲巢居反觀事玄默樂與天爲徒勳名亦何有奈爲形役拘強顏
縉紳後匪慕腰間魚繼志司馬遷承家周亞夫愛之比骨肉豈論親
與疏蹉跎歲華半俛仰德業無值此劬勞日攬涕瞻太虛風生靈竚
作日落浮雲敷毫髮苟足用敢諉籌略疎

和侍講方先生述懷韻

適俗本無願抱道時有心撫躬恆自省冀免清議侵平生二三友不
比商與參冲懷勝骨肉翕若朱絲琴纂修豈其職繼述方自今煌煌
太史筆卓卓鍾山岑淫雨不開霽層雲護疎林邊功雖未奏震雷破
重陰玉堂清晝永計國籌慮深譬彼千鈞重須藉烏獲任薰風拂修

竹餘韻和幽禽戛然成天籟遙遞空中音

送朱思平侍書歸省

風號江浦冬雁落秦淮曉有客將遠歸秣馬涉長道峩峩天台山遙
接蓬瀛島赤霞覆其巔祥光耀穹昊待詔金馬門侍書丹鳳沼三年
瞬息過瞻雲介懷抱陳情達九重歸興入毫杪霜楓纈晴綺寒梅散
冰綺交輝絢錦袍喜映慈容好

題薛孟式滄灣漁舍

營石非夙願幽貞素所服冲懷絕外紛結廬滄江曲涼薰生密蔭時
雨漲新淥水煖鰕魚肥生涯一竿竹得魚不思鸞甕頭酒初熟擊鮮
旋芻醇雅趣聊自足人生貴有適無爲浪奔逐咄此終吾身悠然矢
弗告

五言律詩

和滕至剛韻兼簡頂玄極長老二首

落落星懸曉依依柏傲林文章千古事湖海十年心一別巴川遠重

逢歲月深舊交誰在眼惟子最知音

叢林清譽重湖海慣遨遊翠竹存吾道黃花映霧裘談玄風穴輩達
理大顛流欲効留衣別容予入社不

南中道中口號

自入南中境愁容益以侵有懷常作夢無物不傷心月落關河遠春
來雨露深靈丘何處是遙望淚沾襟

早行

孤館驚殘漏登途竟若迷山形存隱約地勢失高低薄曙欺殘月哀
猿和早雞忽聞飛瀑響已過石橋西

滴淚坡

危崖通絕磴枯木掛長蘿懷古夜郎道勞神滴淚坡陰晴咫尺異冰
雪澗溝多歲暮仍行役私情可奈何

送戚行人

萬里簪纓客三吳闕閭家少至登月窟今日泛星槎使節翩翩影江

梅處處花壯遊當盛世談笑賦皇華

和林嘉猷韻

自作西川客何曾浪出遊幸承恩命及不許路程脩鶴唳山村曉林
空木葉秋眉山文炤在燁燁倚雲浮

敬和賜何通判韻

佐政當繁劇懷才際聖明賜詩雲翰重前席寵光生已勵鷓鴣志還
聞冰稟聲絃歌文化日好繼昔名卿

夏夜和鄭叔貞韻

虛堂無溽暑清氣入懷中故友三年別良宵一笑同薰風來廣席明
月上遙峯傾倒論心臆何須候過鴻

都昌丞洪宗傑秩滿邑民詣闕願留因陞縣令

憶過都昌道民風厚且淳蘇山明浦澈彭蠡枕城闈父老爭留霸朝
廷許借恂二松哦且遍滿縣李桃春

送徐庭舒省親

太學游歌久慈親雪滿頭寸心常愛日千里趣歸舟把酒烏衣巷瞻
雲白鷺洲上堂稱壽畢還旆莫淹留

送葉履道僉憲廣西

秉筆寓盤坡相看髯已皤神功勞紀述臬府聽揮呵百粵山川遠三
台雨露多繡衣行部日桂嶺正嵯峨

送彥德齊教諭之任襄陽

金陵三月花欲燃韶光瑞氣騰九天偶因送客都門道提壺直至龍
江邊龍江畫船密如霧搥鼓催人上船去方舟解維留不得回首恩
恩隔煙樹嫩人自是天台英久持教鐸綽有聲移官忽向襄陽去客
邊別我難爲情襄陽舊治峴山側羊公遺愛今猶昔子去摩挲墮淚
碑千載風流應不識

送姚文靜下第回姑蘇

鳳凰臺前旭日明碧梧葦葦舒新榮丹穴有雛五采色乘時正好相
和鳴自言我是橋門客兩度南宮親射策直言不用歎劉蕡造物冥

冥誠戲劇竭來謁告歸姑蘇清風明月過五湖山花林鳥遠相逐共
喜今吾猶故吾怡顏堂前足春晝霞觴行酒介眉壽明朝躍馬過城
西雅宜壠上低徊久人生立志須及時富貴功名當自期要取銀印
大如斗莫待慈母頻斷機

送劉子祿雲南僉憲

昔我先子華川公國初執節南雲中貞魂上同白日皎孤兒萬里含
哀悰碧雞蠻煙金馬月幾度號呼洒清血回來上疏入九重由此蒙
恩謚文節劉君本是青瑣彥十年載筆光明殿臺綱重振用賢良雲
南肅政新僉憲春風三月發金陵畫船驄馬昭光榮夜郎江上烏蠻
道遙遙清夢隨君行滇池過雨芳草碧柏府深沈映秋色惟將清靜
化夷氓用廣吾皇好生德

送玄義方上人住雙林

古稠之南婺女東有山削立青芙蓉相傳至人宅其下黃雲覆頂金
仙從千巖萬壑逞奇秀至今一一留神蹤直鉤釣魚示真性圓光照

水池波紅尺椎叩門炫丹玉雙檣插地摩蒼穹邇來延歷欲千載勝
事彷彿遺荒宮江南名刹不多見此山屈指齊天童圓庵老禪叢林
伯曾據獅座譚真空機鋒峭厲伏人鬼花雨繚繞來天龍鶴書赴隴
不停馭幸有上第承高風義方固是入室者心印蚤授雲門宗翠竹
黃華了西意士庶奔走無疲癯我家近在山之麓雲峯煙樹遙相通
十年縻祿走南北每歎蹤跡如飄蓬青鐙夜雨玉堂靜林姿谷態羅
心胸何時謁告歸故里握手林下重相逢淵明曾入遠公社勝事敢
與前脩同

七言律詩

調絃江上夜坐

冠蓋相從覲九天扁舟孤下泊調絃月華散水金鎔冶霧氣橫江練鎖川
東望金華家咫尺西瞻錦里路三千此時無限相思意坐對江楓夜不眠

題延翠齋

陳畊樂上清道士

十里烟蘿翠作堆道人家在石巖隈門涵碧落軒窗淨席擁青冥圖畫開

山雨欲來松竹潤，嶺雲初去鶴猿猜。誰能分我數椽地，一洗襟懷亦快哉。
遊善法堂

我愛城南隱者家，一泓流水碧桃花。屋頭巖溜飛寒瀑，門外晴嵐接晚霞。
地僻四時無過客，山暄二月摘新茶。嗟予擾擾勞心役，直欲相從度歲華。
贈進大道上人雲南

三年奔走厭紅塵，偏愛山中道。趣真月轉祇園天，不夜花生淨域地。長春
講經有理懷，支遁問難無窮忝。許詢情事未伸天，罔極幾思結社叩。良因
奉教和資中八景

重龍晴嵐

雨餘山水放清輝，驚見輕嵐上翠微。薄影漸因紅日淡，餘氛猶逐白雲遲。
如綃漠漠籠僧寺，似雨霏霏護石池。底事往來巖壑上，欲隨祥靄出明時。
醮壇雲梯

仙家咫尺隔凡塵，寂寞當年古石壇。蒼蘚重封層磴足，白雲深鎖石梯端。
眼前日月彈丸急，脚底烟霞圖畫閑。欲訪安期問真訣，置身此地杳冥間。

官渡春波

憶昔當年此問津，渡頭青草滿堤生。
行人日暮呼舟急，梢子心諳蹴浪輕。
白石清泉明素志，滄浪綠水濯塵纓。
因茲卻動西陵興，幾度思鄉夢不成。

漁汀晚照

欸乃歌聲酒力微，蘆花汀上見斜暉。
回光布彩隨流水，返照依霞散古磯。
隱約漁燈猶未起，蒼茫釣艇已先歸。
何當來作煙波侶，共和漁汀晚照詩。

靈巖泉韻

靈巖聳拔接孤岑，中有幽泉冽且深。
崖罅遠來稱石髓，澗中微響奏瑤琴。
泠泠靜夜成天籟，脉脉清風作徵音。
不到西湖靈隱久，猶思亭下醒塵心。

奉教賦安岳八景

希夷易洞

嶺岫石洞自天成因遇希夷遂著名山色蒼茫含睡思嵐光冥漠藹
遺情年來誰續羲皇秘月下猶聞子晉笙山鳥林風呼撼處至今彷彿
讀書聲

司戶神祠

古廟淒涼不計年西風落日鎖寒烟石階草沒無人到血食年深有
俗傳敗壁傾欹蘿薜合斷碑剝落篆痕填不知祀典還存否爲爾臨
風一慨然

沙市晚烟

山下孤村十數家晚烟漠漠起平沙幾口縹緲隨風散一抹朦朧護
日斜荒市未昏迷去路前林先暝失歸鴉寒光凝處山巒紫猶帶餘
輝映落霞

鴈塔秋聲

峻嶒鴈塔倚蒼空猶自支撐瓦礫叢前代人名摩滅盡清秋天籟杳
冥中芳聲寂寂消秋雨餘韻沈沈記候蟲尙想慈恩舊遊處少陵遺

興藹無窮

再和張真人見寄韻二首

坐看日月走壺中久識虛無是本宗
瑤草香生瑤署雨巖花影動石壇風
衣冠奕世名何遠印劍傳家譽自隆
長憶看山舊遊日仙巖高處興無窮

世故悠悠不動情致身偶爾入雲程
談玄每遇青年客進諫徒懷白馬生
鳴佩趨朝鍾阜月登臺弔古石頭城
自知家學慙司馬空負山中歲晏盟

題吳文質嵩陽雲樹

延平自昔佳山水聞說嵩陽景更奇
溪樹藏烟陰欲雨嶺雲出岫霏無時
朝川寂寞今誰在盤谷幽深隱者宜
一自承恩居帝里披圖猶起考槃思

七言絕句

題墨竹

湘江春暮雨霏霏舟泊黃陵酒力微夜半開篷羣玉響天風吹下鳳
凰飛

送徐東歸并示穆穰稔輩六首

象鼻原頭萬本松清陰匝護新封也知世澤應鍾此近歲多承雨
露濃

青巖山下石溪頭草屋柴門事事幽但奉歡娛養慈母榮名勢利不
須求

百畝山田繞敝廬近年豐歉竟何如諸郎若肯勤畊種甘旨時供定
有餘

夜讀詩書朝出畊古人多此寄深情殷勤語汝諸兄弟好盡彝倫學
董生

五年滇蜀倦奔馳兩鬢蕭蕭齒亦稀宦業未成人漸老始知三十九
年非

湖海淹留歲月深蕭條苦乏滿籬金傳家幸有遺經在遲汝重來共

寸陰

題墨竹

瀟湘江上暮雲迷
落日無人翠羽低
艤棹黃陵廟前宿
一篷春雨鷓鴣啼

題小畫三首

青蘿山下松濤室
幾度臨風憶舊遊
今日畫圖看髣髴
淡雲疎木不勝秋

勝秋

古樹森沈俯碧灣
江花擁雪正漫漫
海門潮落舟歸晚
鐵笛幾聲人倚闌

三月桃花浪蹴紅
繫船晒網夕陽中
賣魚買得潯陽酒
巖樹生陰坐晚風

龔給事家索菊

長安門外禁垣西
公子幽深帶小蹊
滿圃黃花誰占得
清香曾許我分攜

題野航徐氏雙竹圖

翛然谷口碧琅玕影落澄波夜正寒
獨倚野航人寂寂月華浮水度
雙鸞

送漢陽安知州之任

太平不釣涓溪璜白首之官上漢陽
鸚鵡洲中舊風月從今收拾到
黃堂

題思萱堂

手種萱花近北堂慈親相對百憂忘
年來太學遊歌久一向春暉一
斷腸

題墨竹三首

瀟湘江上暮春時舟泊黃陵思欲迷
夜半忽驚風雨口瀟瀟兩岸鷓
鴒啼

子猷宅畔尋常見蔣詡門前次第栽
山館日斜無俗客清陰忽過短
牆來

慨我居官歲月多每於紫陌聽鳴珂天風忽起王猷宅彷彿朝回闕
下過

寄章同吉三絕句兼東范叔彝

懷人萬里思悠悠清夢尋常到益州昨夜冥鴻將信至開檄字字解
予愁

五更踏月候朝鐘退食詞垣旭日紅金匱玉函披閱遍從容無復舊
時風

范郎辭翰儘堪誇五色卿雲口彩霞不寄冷官王仲子封題偏到繡
衣家

題李白小像

一自騎鯨去不回風流千里數雄才至今采石江頭月猶共長庚燭
九垓

寄叔雍舍姪三首

百畝良田不間畦息耕亭畔曲江湄五年不踏江頭路明月清風午

夜思

長憶青巖舊草堂，手栽松竹翠成行。
諸兒未了公私事，三徑年來想就荒。

滿城風雨五更寒，燈火趨朝夜未闌。
年少曾誇華冕貴，老來方覺布衣安。

題夾梅竹

月白風清夜未央，小窗人靜漏偏長。
翩翩羣鳥來何處，隻影飛隨白鳳凰。

題雪棹圖

萬頃頑雲撥不開，山河大地總皚皚。
懷人夜出山陰遠，興盡何妨半路迴。